

KALAT'A MOSE NABOSO NI BELABE NÁ

BEBOTEDI

Wekabé la wase

1 O bebotedi Loba a weki moñ na wase. 2 Nde wase e ta nuba, e be pe na wom. Mwititi mu ta mu kudumane wase; nde Mudi ma Loba mu ta mu sanjame omõñ a madiba.

3 Na Loba a kwala na: Esele mwene mu be! Na mwene mu timba be.

4 Nde Loba a ta ene ná mwene mwe bwam. Na Loba aba mwene na mwititi. 5 Na Loba a bele mwene ná mwese, mwititi pe ná bulu. 'Wa nde ebiamu e timbing be, na idiba pe: buña baboso bo.

6 Na Loba a kwala na: Esele dibobe di be oteten ibane ya madiba, jabe madiba.

7 Na Loba a weka dibobe la moñ, aba madiba me owas'a dibobe na madiba me omõñ a dibobe. Na mo e be nika.

8 Na Loba a bele dibobe ná moñ. 'Wa nde ebiamu e timbing be, na idiba pe: buña bo londe miba bo.

9 Na Loba a kwala na: Esele madiba me owas'a moñ ma kotome wuma iwõ, ná miñangadu myanji mi buse. Na mo e be nika. 10 Na Loba a bele miñangadu myanji ná mudi, madiba ma kotom pe ná munja. Na Loba ene ná nika ne bwam.

11 Na Loba a kwala na: Esele mudi mu pumele bewudu na mbota i mabole mbolako na myele mi maye bepuma o wase kaponda nai te bena oteten ao nde mbolako ao yeng. Na mo e be nika.

12 Na mudi mu pumele bewudu na mbota i mabole mbolako kaponda nai te na myele mi maye bepuma bena oteten ao nde mbolako ao yeng kaponda nai te. Na Loba ene ná nika ne bwam. 13 'Wa nde ebiamu e timbing be, na idiba pe: buña bo londe milalo bo.

14 Na Loba a kwala na: Esele betrukan be be o dibobe la moñ o jaba mwese na bulu, ná be be ka byemban o lee midiyo ma ponda, miña na mbu, 15 ná be be ka betrukan o dibobe la moñ

o bola mwene o wase. Na mo e be nika. 16 Na Loba a weka betrukan bendene beba: endene o janea mwese, esadi pe o janea bulu; a weka pe na ngengeti. 17 Na Loba a tese mo o dibobe la moñ o bola mwene o wase, 18 o janea mwese na bulu na o jaba mwene na mwititi. Na Loba ene ná nika ne bwam. 19 'Wa nde ebiamu e timbing be, na idiba pe: buña bo londe minei bo.

20 Na Loba a kwala na: Esele madiba ma londe na bewekedi be ben longe, lonon pe lo pumwe o moñ owas'a dibobe.

21 Na Loba a weka nam'a madiba indene na bewekedi ba longe bese be matusé nolo bena be londi o madiba na pum kaponda nai te na lonon la mapupulan lese kaponda nai te. Na Loba ene ná nika ne bwam. 22 Na Loba a namse mo, a kwala na: Biño be yadi, lo tonde, lo londe o madiba ma munja; lonon pe lo tonde o wase. 23 'Wa nde ebiamu e timbing be, na idiba pe: buña bo londe mitanu bo.

24 Na Loba a kwala na: Esele wase e busise bewekedi be ben longe kaponda nai te: byembe, nama i monge mañolo wase na nam'eyidi kaponda nai te. Na mo e be nika. 25 Na Loba a weka nam'eyidi kaponda nai te, na byembe pe kaponda nai te na nama yese i monge mañolo wase kaponda nai te. Na Loba ene ná nika ne bwam.

Wekabé la moto

26 Na Loba a kwala na: Esele biso di weke moto kaponda jenene lasu, a be bowan na biso; a bene janea omõñ a su'a madiba na lonon la moñ na byembe na omõñ a wase nese na nama yese i monge mañolo wase. 27 Na Loba a weka moto o bowan bao, kaponda bowan ba Loba nde a wekingo mo; a weki babo mome na muto. 28 Na Loba a namse babo, mo na babo na: Biño be yadi, lo tonde, lo londise wase, lo sibise pe mo

BEBOTEDI 1, 2, 3

owas'añu; lo bene janea omōñ a su'a madiba na omōñ a lonon la moñ na omōñ a ñama yeşe i matuse ñolo o wase.

29 Na Loba a kwala na: Ombwa, na boli biño mbota yeşe i mabole mbolako yena ye o wase ñese na myele myeşe mi maye bepuma bena oteten ao nde mbolako yeng; man nde me biño da. 30 Nde ñam'eyidi yeşe na lonon la moñ leşe na meşe ma mōnge mañolo o wase, meşe ma ben mudi ma longē oteten ao, na boli mō bewudu ba peña beşe ka da. Na mō e be nika.

31 Na Loba ombwa mambo meşe a weking, nde ombwa, ma ta bwam bwambi. 'Wa nde ebiamu e timbing be, na idiba pe: buña bo londe mutoba bo.

2 Nika so nde moñ na wase ba boleng wekabē na mamuti mao meşe. 2 O buña bo londe samba na Loba a domse ebol'ao a boling; na mō a wumşe o buña bo londe samba oñol'ebol'ao yeşe a boling. 3 Na Loba a namşe buña bo londe samba, a sangişe mō; ebanja oten nde a wumşeng oñol'ebol'ao yeşe a weking, a domşeng pe.

Mōnda ma Edēn

4 Bebotedi ba moñ na wase, kana ba wekabeng, be nde ninka: Ponda Yehova Loba a weking moñ na wase, 5 ke to dibunje l'ebongo di si busi o wase, ke to bewudu pe be si pumed; ebanja Yehova Loba a si ta a mayolise mbua o wase, to moto pe a si ta o sa miñangadu; 6 nde mbā e ta e busa o wase, e sopise moñ a miñangadu ñese. 7 Na Yehova Loba a weka moto na miñangadu a nonging o wase, a wungea mudi ma longē o njongō ao ya pemba, na moto a timba mudi ma longē.

8 Na Yehova Loba a pongō mōnda la jedu o Eden, na mō a jese moto a weking oten. 9 Na Yehova Loba a pumele ñai na ñai a myele o miñangadu, i ta i dolo o jombwa, bepuma bao pe bwam o da, bwele ba longē pe oteten a mōnda na bwele ba dibie la bwam na la bobē. 10 Nde mōpi mu ta mu busa o Edēn o sopise mōnda, na mō mwabanē myopi minje oten. 11 Maboso dina lao ná Pison; mō nde mu dingle ekombo a Havila yeşe, wuma gol ñeno; 12 gol a y'ekombo ñe bwam; oten pe nde ibañ Bedolak na dale la tiki Soham beng.

13 Mōpi mu londe miba dina lao ná Gihon; mō nde mu dingle ekombo a Kus. 14 Mōpi mu londe milalo dina lao ná Hidekel; mō nde mu mōnde o jedu la Asiria. Mōpi mu londe minje dina lao ná Eufat.

15 Na Yehova Loba a nongō moto, a jese mō o mōnda ma Edēn o pongō mō na tata mō. 16 Na Yehova Loba anea moto, a kwala na: We wonja o da bepuma ba myele myeşe mye o mōnda; 17 nde ba bwele ba dibie la bwam na la bobē o si da mō: ebanja buña o madang mō o mawō.

Tēşegē la diba

18 Na Yehova Loba a kwala na: E titi bwam ná moto a be musoloki; na maweke mō mongwanedi ñena ñangamē mō. 19 Na Yehova Loba a wekane ñam'eyidi yeşe na lonon la moñ leşe miñangadu, a wanea mō moto o jene ñeni eno ná a bola mō mina; ná to njika dina moto a mabolang eweked'a longē te, mō nde di mabe dina lao. 20 Na moto a posea byembe beşe mina na lonon la moñ leşe na ñam'eyidi yeşe; nde oñola moto a si soi mongwanedi ñangamē mō. 21 Na Yehova Loba a bola ná iyo yaleye moto na ngiña, na mō a kō iyo na tum; na mō a nongō mbanj'ao po, a diba pe wa wuma n'eyobo. 22 Na Yehova Loba a weka muto na mbanja a nonging o ñol'a moto, na mō a wanea moto mō. 23 Na moto a kwala na: Nun so nde e ewes'a bewese bam n'eyobo a eyobo am; a mabelabe nde ná muto, ebanja a nongōbe nde o ñol'a moto.

24 Oñola nika moto a mende dia sango na ñango, a tingame na munj'ao; nde ba mende nde be eyobo ewō.

25 Nde babō babanē ba ta nde musamba, moto na munj'ao, nde ba si ta ba bwane nika ison.

Kō la bobē

3 Nde ñama-bwaba e ta misomba buka ñam'eyidi yeşe yena Yehova Loba a weking. Na mō e kwalanē muto na: Obwa, Loba a kwali na mbale na: Lo si da ñai a myele yeşe ye o mōnda e? 2 Na muto alabē ñama-bwaba na: Je wonja o da bepuma ba ñai a myele ma mōnda yeşe; 3 nde oñola bepuma ba bwele bo tem oteten a mōnda, Loba a kwali na: Biño lo si da mō, lo si tapa

BEBOTEDI 3, 4

pe to mo, lo si ya be lo wo. 4 Na nama-bwaba e kwalang muto na: Lo si mawo tomtom. 5 Nde Loba a bi bwam-bwam ná o buña lo madang mo, miso mañu ma matelame, nde lo mabe ka Loba momeñe, lo bia nje ye bwam na bobe.

6 Nde muto enno ná bepuma ba bo bwele be ta bwam o da, be dolo pe o jombwa, na ná bo bwele bo ta pe bo nongone mulema, ebanja bo ta bo wele bola moto dibig, na mo a pata epum'ao, a da, a bola pe mom'ao nu ta na mo, na mo pe a da. 7 Nde miso ma babo babane ma ta ma telame, na babo ba bia ná be nde musamba; na babo ba longa byadi ba jangolo, ba pongea babo momeñe bekube.

8 Na babo ba senga matanga ma Yehova Loba, ke a madangwa o mōnda o pond'a komea la buña. Na moto na munj'ao ba wutamé Yehova Loba oteten a myele ma mōnda. 9 Na Yehova Loba a bele moto, a kwalang mo na: We nde we e? 10 Na mo a kwala na: Na sengi wa o madangwa o mōnda, na bo bongó, ebanja ne musamba, oñola nika nde na wutamno. 11 Na Loba a kwala na: Nja a langwedi wa ná we musamba e? Wa ná o si made nde bo bwele naneding wa ná o si da e? 12 Na moto a kwala na: Muto o boling ná a je na mba nde a boli mba epum'a bo bwele, nde na deding. 13 Na Yehova Loba a kwalang muto na: Nje o boling nika e? Na muto a kwala na: Nama-bwaba nde e wondi mba, nde na deding.

14 Na Yehova Loba a kwalang nama-bwaba na: Kana o boling nika, o loabe oteten a byembe beše na nam'eyidi yese; o mende nde jongo dibum longo o wase, o mada pe nde miñangadu o longe longo lese. 15 Na mawe le bosinga oteten angó na muto na oteten a mbot'ango na na muto. Mo a mende ñoso mulopo mongó, wa pe o mende laba mo o tanga lao.

16 Na mo a kwalang muto na: Na makolise mutaka ma meme mongó, o mende nde ya bana na sese, mpuli mongó mu mende nde be na mom'ango, mo nde a mende janeye wa. 17 Na mo a kwalang pe moto na: Kana o senganno doi la munj'ango, na wa o da bwele naneding wa ná o si da, miñangadu mi loabe oñol'ango; o mende nde dane mo na ndutu o miña ma longe longo mese. 18 Mi mende yeya wa ngengele na nga-

ngadi; o mende pe da belembe ba mōnda. 19 Oñol'enang'a boso bongó nde o mende da da longo naté o timba o miñangadu mena oten nde o nongobeno; ebanja we nde miñangadu, o miñangadu pe nde o matimbano.

20 Na moto a posea munj'ao dina ná Eva, ebanja mo nde e ñango a beše be longe. 21 Na Yehova Loba a pongea moto na munj'ao mbot'a byobo ba nama, a botise babo.

22 Na Yehova Loba a kwala na: Ombwa, moto a máimba ka mo ñasu, kana a mábiano nje ye bwam na bobe. Tatan a si sambise pe so dia lao, o pata na da bepuma ba bwele ba longe ná a be longe bebe beše. 23 'Wa nde Yehova Loba a busiseno mo o mōnda ma Eden, ná a bole ebolo o miñangadu mena oten nde a nongobeno. 24 Nika so nde Loba a pangino moto; na mo a jese kerubim o jedu la mōnda ma Eden na po a misonji ma wea o tata ngea ni maleye o bwele ba longe.

BETILEDI BA BOSANGI

MALE MA KWAN

NA

MALE MA PENA

La Sainte Bible en langue douala

053

BFBS-1970-6M

ISBN o 564 00352 2